

義寧州志卷第二十二

方技

日者龜策劍術醫卜史漢所紀方技之目小道可觀一善
斯錄維茲游藝詣能致曲有見於時亦詒芳躅匪同稗官
徒費簡牘志方技

宋

張損字益老與黃魯直同閭閻有巧思游意塵埃外嘗製琴
十二曰澗泉曰香材八節曰號鐘曰玉磬曰松風曰媧簧
曰南風曰舞胎仙曰秋思曰魚根曰九井璜曰天球魯直
皆為銘之且遺書推為嘉器能得古人風聲氣習願附名
不朽損有郭西水磴得蕭宰從頤旨減柴牌之害魯直特
為致謝其為當時名流所推重如此

山谷全書

義寧州志

卷二十二

方技

四百一十

王申字良翰洛州守純中子工繪事嘗為黃魯直摹韓幹廿
餘馬及閻立本十二國圖魯直目為佳物約荆南胡逸老
來觀申又嘗作行菴魯直銘之曰剪椽作菴駕以人肩利
用行遠琴几後前衲子師之行坐俱禪涉江東西浸湖南
北視之菴也行遠有足器成便成用之日新創物之智艾

王君申

上全

樊憲可號律軒仁鄉人精醫術理宗皇后疾醫者弗效憲可
市藥杭州召而治之遂愈賜以官辭不受後卒於杭勅塋
東津今名樊家山

元

祝泰字輔卿吳仙里人彬之子通周易精於陰陽術數所著
有奇門年月行於世

明

鄭延謙泰鄉石岐人通天文洪武十六年有司舉任陰陽學
訓洪武二十六年冬太祖因暹羅國使臣未至詔天下陰
陽卜者千有餘人卜而驗者止三十六謙居首上亟賞之
世其官

沈源字不竭西鄉人重厚端謹好讀書精於醫鄉人有請雖
寒暑風雨必至所活甚眾而余貴升者里下人敦尚氣節
工於梅蘭竹石士夫爭購之號樵隱年七十卒

鄧聖章安鄉湘竹人有道術祈晴禱雨治病驅邪輒有應臨
終偈云落落魄魄無執無著不喜不怒先覺後覺跳出塵
籠蓬萊著脚

國朝

義寧州志

卷二十二

方技

二 四百六十五

吳成伯武鄉寧前人精岐黃數年前能診人生死有鄉人
猝死具棺繫豕治喪具吳聞駭曰此人予昔診不應今
歲死胡為不然疾趨視之已將就殮見其目尚未陷乃
以葯吹鼻隨甦而愈又有村兒羣嬉於野吳見一兒顛
忽凹語其鄰曰此兒有病不速救今夕戌發亥死鄰語
其父延治之兒畏針灸走匿麥稈中吳乃歸及暮疾作
依期而卒其神異甚多活人無算

王松字偉期州治人少為諸生落落有奇氣晚號艾國閒
人書法鍾王畫山水法黃鶴山樵性耽花石經營布置
別有巧思乾隆二年纂修志乘松摹縮八鄉為圖如掌
紋藻炳晚年貧益甚終隱於畫醉筆狂揮皆得米顛生
趣遇賞識則傾篋相贈富人雖多金購必峻拒之嘗為

友人寫風雪圖題句云崖懸阮籍眼樹折陶潛腰有屋
皆堆玉無山不湧潮可想見其風致

羅浮梅字振魯別號雪峰隱居迨瀨工畫梅每一幅成人
爭以金錢購之浮梅得錢即招集同人倡和梅花詩詞
縱飲極樂孝廉劉顯祖為羅浮梅說曰羅君以浮梅自
况也殆深意於師雄一夢哉昔趙師雄遊羅浮夢美人
芳香襲人叩酒家共飲醉卧而醒身在大梅樹下見月
落參橫翠羽啁啾遂悵然歸今羅君性嗜梅齒嚼梅片
口詠梅詩手寫梅狀無時不在暗香疎影中羅之大覺
豈不勝師雄之癡夢哉州司馬翟斯沅贈句云幽人不
作師雄夢修到梅花骨欲仙熊高福贈句云古貌古心
饒古趣此生端合住羅浮年八十餘一日晨起寫梅十

義寧州志

卷二十二

方技

三

五百二十五

幅擲筆而逝

胡松字穎達號青圃泰市人性至孝嘗刲股以療母病後
治盧扁術深知變法每遇求醫無遠近輒應活人無數
不責償有貧不能就醫者並書方購葯給之其慇懇濟
人如此年八十餘見孫涵酉領嘉慶辛酉鄉薦

王作楫字定波號古愚奉鄉江頭人幼警悟讀書能通大
義年十九補弟子員嘗言學必期有用達則用才以施
政窮則用術以濟人分也遂力攻醫術凡黃帝靈樞神
農本草秦越人難經皆研鍊精深得其旨趣以醫術鳴
於時有李某子甫週病危欲絕舉家惶泣作楫過而視
之曰此風閉也用按摩法以火灸之立蘇族叔某者病
死數日將殮作楫往唁探其胸微溫曰此氣閉也灼其

背霍然醒進服理中湯數日而愈著有急救驗方保產
要書又精形家術力辯斗首五行之妄發明陽宅大成
諸書正以造命五行著選擇先資行世

姜璧字幼石號笨人武鄉人通畫家六法尤工山水得荆
關筆意每酒酣潑墨迥出塵表喜吟咏多由天機而成
卜築灌城東湖上與游皆知名士破屋數間唱和琳瑯
滿壁晚年技益精放浪自喜遂老於東湖